

Moyo Uliumbwa Upya Hupenda kama Kristo Alivyopenda

Amri mpya nawapa, Mpendane. Kama vile nilivyowapenda ninyi, nanyi mpendane vivyo hivyo—**Yohana 13:34.**

Yesu anasema, “Mpendane ninyi kwa ninyi kama Mimi nilivyowapenda ninyi.” Upendo si msukumo tu, mwako wa muda mfupi, unaotegemea mazingira fulani; ni kanuni inayoishi, nguvu ya kudumu. Nafsi inalishwa na mikondo ya upendo safi utiririkao kutoka kwenye moyo wa Yesu, kama kijito kisichokauka daima. O, jinsi moyo unavyohuishwa, jinsi nia zake zinavyoadilishwa, mapenzi yake yanavyozidishwa, kwa ushirika huu! Chini ya elimu na nidhamu ya Roho Mtakatifu, watoto wa Mungu hupendana, kwa kweli, kwa dhati, bila kuathiriwa, “bila upendeleo na bila unafiki.” Na hii ni kwa sababu moyo unampenda Yesu. Upendo wetu sisi kwa sisi huchupa kutoka kwenye uhusiano wetu wa kawaida na Mungu. Tu familia moja, tunapendana kama Alivyotupenda sisi. Unapolinganishwa na upendo huu wa kweli, Mtakatifu, wenye nidhamu, adabu duni ya ulimwengu, uoneshaji wa upendo wa urafiki usio na maana, ni kama makapi kwa ngano.

Kupenda kama Yesu alivyopenda inamaanisha kuonesha kutokuwa na ubinafsi wakati wote na mahali popote, kwa maneno mema na mwonekano wa kupendeza... Upendo wa kweli ni sifa ya thamani ya asili ya mbinguni, ambayo huongeza harufu yake kwa kadiri inavyotolewa kwa wengine...

Upendo wa kristo ni wa kina na wenye bidii, ukitiririka kama kijito kisichoweza kuzuilika kwa wote wanaoukubali. Hakuna ubinafsi katika upendo Wake. Ikiwa upendo huu uliozaliwa mbinguni huwa kanuni ya kudumu moyoni, utajitambulisha wenyewe, si tu kwa wale tunaowapenda katika uhusiano Mtakatifu, bali kwa wote ambao tunakutana nao. Utatuongoza kutenda tendo dogo la usikivu, ili kutoa ridhaa, katika kufanya matendo ya ukarimu, kuongea kwa maneno mazuri ya kweli na yenye kutia moyo. Utatuongoza kusikitika pamoja na wale ambao mioyo yao inahitaji kuhurumiwa.